



**Inatsisit attuumassuteqartut allanngortinneqarnissaannut siunnersummik UPA 2016-imut
Naalakkersuisut suliniuteqaqqullugit peqquneqarnissaat pillugu Inatsisartut
aalajangiiffigisassaattut siunnersuut, taamaaliornikkut inoqutigiit 400.000 kr.-t ataallugit
isertitallit napparsimasut angerlarsimaffianni nerisaqarnermut ineqarnermullu
akiliuteqartarunnaarsinnaaqquullugit.**

(Inatsisartunut Ilaasortaq Anthon Frederiksen, Partii Naleraq)

**Pinartumik napparsimasoqartillugu ilaquaasut Københavnimi kalaallit peqqissartut
najugaqarfianni ineqartinneqartillugit ineqarnermut aningaasartuutit 2016 aallarnerfigalugu
pisortanit akilerneqartalernissaat sulissutigeqquullugu Naalakkersuisut peqquneqarnissaannik
Inatsisartut aalajangiiffigisassaattut siunnersuut.**

(Inatsisartunut Ilaasortaq Mimi Karlsen, Inuit Ataqatigiit)

Siullermeerneqarneri

Inatsisartunut ilaasortat Anthon Frederiksen Partii Naleraq aammalu Mimi Karlsen Inuit ataqatigiit, Danmarkimut napparsimasut ilaqtaminnik angalaqateqarlutik katsorsartikkartortut napparsimasut ilaquaanullu atugassarititaasunik pitsangorsaanissamik aalajangiiffigisassamik siunnersuuteqarput tamannalu Partii Naleqqamiit oqaaseqarfigissavarput.

Ukiuni makkunani nunatsinni napparsimasortatta atugai oqitsuinnaanngitsut tusarlugillu paasisartakkagut amerliartorput. Pingaartumik napparsimasut nunatta avataanut aallarlutik katsorsartikkartortartut eqqarsaatigalugit.

Nunatsinni ukiuni makkunani pingaartumik kræfterlutik napparsimasut ajoraluartumik amerliartuinnartutut misinnarput, tamannalumi ilungersunartutut tigullugu suliassatut

tigusariaqarparput, ilaatigullu nappatsaaliunissamut suli annertunerusumik paasitsinsiaanissaq ingerlanniartariaqaripput kammattuitigalugu, aammalu uagut nammineq inuttut peqqinnarnerusumik inuulernissarput sulissutigalugu.

Taamaakkaluartoq nappaatit sukkulluunniit takkuttarnerat naammattuugassaajuarpoq naak ilaatigut inuttut imminut paarilluarneq atuukkaluarpalluunniit.

Kiisalu nappaatit allat nunatsinni katsorsarneqarsinnaanngitsut eqqarsaatigalugit napparsimasunut ilaquaanullu angalanermi ineqartitaanermilu atugassarititaasut pitsangorsarneqarnissaat ilungersuullugu aaqqinniartariaqalerparput, siunnersuuteqartullu ajornartorsiutit naammattoorneqartartut aaqqinniarlugit saqqummiussaqarnerat iluarisimaarparput.

Napparsimasut amerlasuut pisariaqartittarpaat katsorsarneqarnerminni ilaqtaminnik najorteqarnissartik, tarnikkummi timikkullu assoroornarlunnartumik atugaqarlutik nunagisaq qimallugu ilaqtat maqaasillugit kiisalu angerlarsimaffit ungaseqalugit, ilaatigullu perulullutik ernumallutilu ilatik sivisuumik qimallugit katsorsarneqartarlutik, tamannalumi nukimmik napparsimasumut annertuumik atuiffiusarpoq, tupinnangilarlu ilaqtat napparsimanerminni nukittorsaatitut pisariaqartillugit amigaatigisarmatigit.

Taamatut nalaataqarluni napparsimasunut ilaquaasunullu assorujussuaq ilaatigut inuuniarnikkut allatigullu ajornartorsiulertarput. Akiliisinnaanerat killeqartorujussuanngortarput, ilaqtariit inuuniarnikkut allarpassuartigullu ajornartorsiulertarput ikorsiisoqartarpoq, ilaatigullu ikorsiisoqarsinnaanngivittarluni.

Ilaqtat napparsimasunut ornigunnerminni ineqarnerminnut nerisaminnullu pinngitsooratik akiliisartussaapput, napparsimasullu uninngavianni inissaqanngikkuni sumi tamaani inissarsiorlutik pisarnerat inunnut ajornartorsiortunut artorsaateqareersunullu ilungersunartorujussusoq oqaatigineqartarpoq.

Tamannalumi ajornartorsiut ilungersunartoq qaangerniarlugu Partii Naleqqamiit kissaatigaarput atugassarititaasut taamak ilungersunartigitillugit aaqqiissutissamik iluarsiisoqartariaqartoq.

Inuppassuit nunatsinni ilaatigut akissarsiat minnerpaartaannik aningaasarsiaqarlutik sulipput, tassuunalu aamma takuneqarsinnaavoq inuuniarnikkut atukkat oqitsuinnaanavianngitsut, oqilisaasoqartoqartariaqartorlu. Ilaatigut kommunit ikiusinnaanerat killeqartorujussuuusarpoq ilaatigullu itigartitsivittarlutik.

Taamaattumik napparsimasut ilaqtaminnik pisariaqartitsisut ikorsiiffigineqarnissaasa isumannaarneqarnissaat ataatsimoorullugu Inatsisartuni aamma kommunit ilanngullugit aqqutissiuutissagipput Partii Naleqqamiit kaammattutigaarput.

Ullormut akiligassat ineqarnermut nerisaqarnermullu, ilaqtariit napparsimasoqarneranni ingiaqataasunut Danmarkimi akilertinneqartartut inuppassuit akilersussallugit artorpaat, tassami amerlaqaat suliluunnit aallaratik aningaasarsiorneri unereertarlutik aammalu nunaminni angerlarsimaffimminni akiligassanik ineqarnermut allanullu ajornartorsiorujussualertarlutik, tamannalu taamatut atugaqartunut toqqisisimanngitsorujussuussasoq takusinnaavarput.

Napparsimasut pinartumik inunermut ulorianartorsiorneranni peqqinnissaqarfimmit ikiuisarneq qujanartorujussuuvoq aammalumi tamanna pissussissamisoorpoq.

Kisiannili assersuutigalugu sivisumik napparsimavinni uninngasut kræftertullu ilaqtaminnut maqaasillutik peqqissarnerminni ilaqrarusukkaluartut amerlasuunut periarfissat killeqaqalutik ilaatigullu ikiorneqarsinnaanngivittarlutik atugassaqartitaanerat ilungersunartorujussuartut Partii Naleqqamiit oqaatigissagatsigu.

Tassami ilaminnik tikeraartoqassagunik taava amerlasuutigut ineqatigisinnaanngilaat, ineqatigissagunikkilu akikitsuinnaanngitsumik inigisaminnt nerisaminnullu akilersuisinneqartarlutik naak ilaatigut akissaqanngilluinnaraluartut.

Inuit pissarissaartut taamatut najuuttarnertik ilungersunartorsiutigivallaarneq ajorpaat kisiannili inunnguit aningaasarsiornermikkut periarfissaqarpallaanngitsut assorujussuaq ajornartorsiortartut oqaatigineqartapoq aammalumi amerlaqaagut politikkimi suliaqartugut apuussiffigineqartartut ilaquaasunik napparsimasut najoriartorlugit orniguttartunik.

Naalakkersuisut akissutaat assorujussuaq pakatsinarpoq. Pissutsit atugassarititaasullu sukumiisumik aaqqinniarnissaannut tikkuussaqanngimmata, aap tamatta pingaartipparput nappaatinik pinaveersaartsinissaq, kisiannili tassa nappaatit sukkulluunniit takkuttarput uanilu siunnersuutini saqqummiunneqartuni nappatsaaliuinissaq pineqanngilaq napparsimasunukua pitsaanerusumik ilaqtaminnik najorteqarlutik kaatsorsarneqartarnissaat pineqartoq.

Taamaattumik partiit allat Partii Naleqqamiit kammattorniarpagut siunnersuutit akuersissutigineqarnissaat Inatsisartuni naqissuserneqassasoq. Tassami tamatta ataasialinngilagut qineequsaarnerni nunarput qimallugu napparsimasut katsorsartikkiartortut atugaasa

oqinnerulernissaat sulissutiginiarlugu, aaqqiinissamillu siunnerfilimmik Inatsisartunut saqqummiussisoqaraangat itigartinneqartarneri tulluarunnaarluiinnarpoq.

Naalakkersuisooqatigiit isumaqatigiissutaanni issuaalaassaanga ima:

“Avalallutik katsorsartikkiaartortartut ilaqtuttaminnik najorteqarnissamik pisariaqartitsisut iluarsaaffigineqassaaq.”

Uanilu siunnersutini marlunni anguniagaq taannarpiaq siunnerfigalugu saqqummiussisoqarpoq tupinnarluinnartumillu itigartinneqarnera akuerineqarsinnaanngilaq. Tassami Naalakkersuisooqatigiit isumaqatigiissutaat atsiorneqarnikuovoq siunnersuutillu marluk Naalakkersuisooqatigiit anguniagaanut naapertuulluinnarlutik.

Siunnersuutit qulequttamikkut assigiinngillat tamannalu uniffiginagu naaperiarnermi allanngortinneqarsinnaammata ammaffigalugu Partii Naleqqamiit oqaatigissavarput. Inuimmi ikiorniarneqartut pineqarmata qulequttat uniffigineqarsinnaanerat takorluunngilarput.

Taamatut oqaaseqarluta siunnersuuteqartut Anthon Frederiksen Partii Naleraq kiisalu Mimi Karlsen Inuit ataqtigiit, siunnersuutaat tamakkiisumik taperserlugit peqqinnissami ataatsimiitaliami suliarineqarnissaat innersuussutigaarput.